

### 墾務大臣綏遠城將軍貽奏統籌後套渠地全局亟宜大加修治推廣利源摺

竊奴才於本年乙巳四五月間履勘後套循視渠地業將渠地大概形勢於奏改杭錦押荒歲租摺內擇要陳明然此第就一旗而論猶未合渠地全局而籌也查河套七旗中惟杭錦達拉特兩旗兼跨黃河南北其在河西北之地橫亘套外處處依渠爲命遂視他處獨腴綜計兩旗各大渠皆杭受其源達承其委從前墾務未經官辦地由民戶私墾渠亦由民戶自開凡來種地者甫經得地先議開渠支別派分各私所有往往一渠之成時或需至數十年款或糜至十餘萬父子相代親友共營而已成之渠又必每歲深刷其身厚增其背其流動充滿而漸至漑用千百頃者良非易也自二十九年春夏間七旗一律報墾於是杭達各地戶有渠之家知地旣統歸官放渠亦難據爲己有先後將祖遺自挖各渠呈請報効其中大幹最著名者口不五如河塔布河若纏金渠長勝渠老郭渠其餘報効小幹渠及以枝渠報者尙數十家奴才飭局驗收估計工程一面由西路公司添招股本項下酌賞渠費一面將已收各渠飭公司備款添員逐一加修其年久漸淤者濬之疏之使無壅遏又將各大渠中間扞格不通之處創興工作俾其綺交脈注源匯流分隨地皆可引渠有渠皆能灌地施工之始卽將長勝渠改名長濟渠纏金渠改名永濟渠挑濬深通因勢利導又添設枝渠數道以

分水勢而廣渠利其老郭渠等渠亦次及之此次循征所至一一親歷無遺凡前飭加修新開各工已成十之八九計可灌田萬餘頃就目前而論應收押荒渠租約在三四十萬兩足抵所賞渠費所用經費而有餘似已收效捷而獲利倍矣然從來遠大之業不囿近功故規畫必計百年運謀至周數世自昔邊臣興利從事農田引水疏陂久而勿廢若漢書溝洫之志史記河渠之書既徵其意美法良思深慮遠西北近河之地昔人稱爲上腴徒以僻在邊陲介於戎索不勤遠略者或度外遺之我朝撫有諸藩悉主悉臣咸遵約束獨此開墾一事議久未行仰賴聖主恩威奴才得所藉手既知爲無窮之利卽不敢不矢以經久之心查後套地必附渠渠所能澆始得謂地以兩旗沃野千里而猶菁華久闕未盡南東其畝者則以渠利止此故也今達拉特旗旣謂渠至何處地卽開至何處杭錦旗呈報之地亦所在宜渠計兩旗已開之地不到萬頃而利已倍蓰倘擴而充之渠日加多卽地日加廣約計套地尙不到萬頃而利已得數萬頃異日所入將有數倍於今日者若僅規畫目前不作引伸之計不惟地利可惜奴才自問亦覺職分有虧其何以仰副朝廷委任卽現在墾員畢集官力正充不趁此率作經始之時一氣呵成逐漸推廣過此以往卽有賢疆臣力爲經營而再造之難等於謀始孟子曰今時易然時誠不可失也此人力事半功倍者也但水勢愈引

而愈上必激之而後能行渠工愈浩而愈難卽節之而已不資近來部庫支絀晉省更無餘力顧此奴才晝夜籌思惟有就現在應收之款悉歸工作迴環挹注務竟其功加修鐵軌成一段路開一段車以所收車資仍用修路如此源源更代不數歲利大興矣凡此皆就所有之渠塞者通之淺者深之短者長之幹者枝之循洛之故道以暢來源順水之下流以爲洩處其事雖繁於創而其功率出於因若平地鑿空無中生有恐非三五年所能奏效更非數十萬所能奏功此又財力之事半功倍者也擬請 旨飭下部臣所有伊盟各旗押荒達拉特旗現收渠租除各舊款凡非應歸公者均暫緩提撥以備渠工大修之費需之愈緩則報之愈豐收效於一時轉失百年之利事有必至理有固然奴才明知部庫需款孔亟而必固請暫緩提解者誠以一時之力有限百年之利無窮也如蒙 俞允奴才卽將晉省前墊經費逐漸退還以清款目卽西路公司亦擬將前次所集官商各股結清本利從此多添官股少留商股俾以後渠利官居八九商居一二將來暢收利益仍當專款存儲隨時報部聽候撥用謹 奏

商部頭等顧問官張咨呈本部籌議沿海各省漁業辦法文

本年三月二十七日承准南洋大臣服會會同北洋大臣具奏次第開辦江浙閩廣奉直